

**DE GLORIOSISSIMA
CHRISTI DOMINI
ASCENSIONE ORATIO
HABITA PRID. ID. MAII
1744. IN SACELLO...**

Carlo Livizzani, Valenti Gonzaga



BEATISSIME PATER.



D argumentum gaudeo me
natum esse, BEATISSIME
PATER, quod licet nullo
sententiarum, verborumque splendore tibi
offerat exornatum oratio haec mea; digni-
tatis tamen, quam summa cum laude susti-
nes, amplitudini consentaneum prorsus exi-
stimo, probandumque iudicio tuo & gravif-
simo, & maximo. Agitur enim de celeberrimo
Christi Domini triumpho, qui in Caelum
ascendens humanitatem hanc nostram in al-
tissimo lucis fastigio collocavit, & se pro no-

bis omnibus Advocatum apud Patrem constituit : quae sane cogitatio gratissima fidelibus esse debet , Tibi vero in primis Supremo Ecclesiae moderatori , quae Victoris Domini patrocinio confirmata procellas inter ac turbines nullum sibi detrimentum , nullam Religioni perniciem veretur . Quare quum caeteri ad hanc Sedem majestatis , ac sapientiae tuae lumine circumfusi accedere minime audeant , nisi perfectum aliquod absolutumque se afferre posse confidant , me tamen ob causae ipsius , quam agendam suscepi , praestantiam & jucunditatem admirabilem , neque ingenii tenuitas , neque perexigua sane doctrinae exercitatio ab hoc aditu laudis amplissimo prohibuerunt . Huc etiam accedit singularis in Patrum meum beneficentia Tua , quae dum oculis obversatur meis , fidentiori me animo esse jubet , & in spem venire certissimam fore , ut , quaecumque sit , hoc observantiae monumentum , meque ipsum humanitate , qua vales plurimum , ac benevolentia , complectaris .

ORA-

ORATIO.

5



Vicimus hodierna die , magnificeque vicimus , quum Dei Filius ad Patrem rediens non tam sibi , quam nobis omnibus triumphavit . Nam si vicit , qui , quod contendit , obtinuit , laetari nunc sane debet , ac triumphare oratio nostra , quum ea divinitus adepti simus , quibus possunt ne voto quidem meliora concipi . An id minus confidere audeamus , quia Redemptor , ac Parens optimus , quo se mens nostra recreabat ac solabatur uno , longe a nobis recessit , nec jam licet in ejus vultu , atque oculis acquiescere ? At hujus triumphi pompam si satis grato animo interpretemur , non haec absentia , sed judicanda praesentia est , & certe maxime salutaris . Quem enim praesentem oculis desideramus , praesentem numine , vique arcana propitium experimur , dum nobis ipsis & sui possidendi cupiditatem ingerit sane maximam , & certissimam obtinendi fiduciam impertitur .

A 3

II-

Illud mihi non semel venit in mentem
 quaerere, cur hac quotannis celebritate sibi
 Ecclesia cum Apostolo gratuletur, ad bea-
 tam immortalitatis sedem impleturum pro
 nobis omnia Christum Dominum ascendisse.
 Nonne Crucis trophaeum aperte praedi-
 cat, salutem, ac redemptionem nostram,
 cumulatissime consummatam, quum inter-
 mortuis quidem, minime tamen obscuris
 vocibus hoc testatum reliquerit Homo Deus?
 Nonne idem quoque vel multo illustrius
 ipsius Resurrectio confirmavit, qua peccati
 stipendia deleta sunt, & absorpta mors in
 victoria? Hoc qui audeat inficiari, profe-
 cto arbitror esse neminem, nisi idem per-
 ditus omnino sit. At enimvero quamquam
 nihil eorum ex omni parte non absolutum
 fuerit, quae gerenda susceperat divinus Amor;
 tamen, si humanae imbecillitatis ratio ha-
 beat, nonnulla, quae complerentur, adhuc
 esse reliqua videbantur. Discipuli quidem,
 ut Augustinus ait, Jesu Christi aspectibus
 adjuvabantur, confirmabantur operibus, &
 virtutibus pascebantur; sed tot tantisque
 argumentis mirifice eruditi nondum adhuc
 didicerant & vera bona unice cupere, &
 studio, quo decet, maximo adamare Pa-
 sto-

Ephef. 4.

Jo: 19.

*Rom. 6.
1. Corin-
thios 15.*

*Serm. 85.
de Temp.*

storem, Praeceptoremque suum, a quo sunt ideo vel inscitiae in precibus aliquando, vel in votis audaciae insimulati. Vix autem illis videntibus ipse ad Patrem ascendit, desiderium sui admirabile in eorum animis excitavit, qui propterea omni de principatu contentione deposita, caelestia duntaxat quaerere tum coeperunt, ac terrena despicere, eos nimirum scopulos feliciter declinare, ad quos paucorum est non appellere, & appulso non adhaerescere. Post illam quippe inusitatam inauditamque triumphi speciem, quo sese Apostolorum vota, cogitationesque verterunt omnes? quae ipsorum oratio esse coepit? quis ardor animi? quid cupiebant? quid optabant? Hic nimirum communis omnium erat animus, oratio haec una in ore omnium: Cupio dissolvi, & esse cum Christo. Quam quidem vocem quoties mecum ipse tacitus repeto, toties videre videor Coetum illum magnanimum superstitionis ultorem incredibilia pro veritate facere, & pati asperrima paratissimum, nunc in turpissimos gentium ritus, sacra, ceremonias, & nefarium deorum gregem, erroresque teterrimos decertantem, nunc divino dicendi genere cum pravitate, cum

Matth.
20.

Philip. 1.

furorē, cum scelere colluctantem, nunc adversum minas, & supplicia quaeque atrocissima se componentem, nunc ipsos etiam in satellites & carnifices insultantem, atque illa mirum in modum patientem omnia, quae sunt iis fortiter subeunda, qui sceleribus hac conditione bellum indixerint, ut numquam quiescere, desistere numquam velint, nisi exploso mendacio, fanaticisque mentibus vera ibi Religio sedem habeat, ubi habuerat superstitio principatum. Undenam, obsecro, in Apostolis mutatio haec tanta, *Psal.* 76. quae vere mutatio fuit dexteræ Excelsi? *Act.* 5. quid modo gaudentes properant a conspectu concilii, cujus antea pertimescebant vel nomen ipsum? *Galat.* 6. quid unice nunc gloriari se in Cruce praedicant, quam modo divino Sanguine consecratam incredibiliter perhorrescebant? quid uno verbo, qui tam antea timidi, nunc tam magnanimi? quia videlicet post hunc triumphum nihil in votis habebant aliud, quam ut cumprimum, cujus aeternum lumen in terris viderant, illius regnum in aeternitate consequerentur, & *Luc.* 24. veluti eundem pati oportuisse non ignorabant, ut intraret in gloriam suam, ita & ipsi Praeceptoris exemplum aemulaturi, mortem

tem non solum cupiebant, sed etiam studio-
 fissime invitabant. Illa scilicet divina lux,
 qua circumfusus in caelum ascendit Dominus;
 illa, illa Apostolorum egregio in pectore
 flamma fuit & generosa, & efficax, & im-
 mortalis? Quidni ita existimaverim? Quo-
 rum oculos ad breve tempus in monte Tha-
 bor Divinitatis majestas in sui spectaculum
 admirationemque rapuerat, ii statim tria
 ut illic tabernacula constituerentur studiis
 omnibus optaverunt: & dubitabimus, quin
 iidem noctes diesque cuperent illius in am-
 plexibus beatissime conquiescere, quem ho-
 die aspexerant in caelum ferri longe lateque
 insignibus coruscantem? Imo vero tum coe-
 perunt ardentem cupere, tum expetere ve-
 hementer caeleste regnum in perpetuae virtu-
 tis firmitate consistens. Qui tot miraculis
 confirmati, tot sermonibus eruditi, Redem-
 ptoris tamen mortem expaverant, & veri-
 tatem Resurrectionis non sine haesitatione
 susceperant, tantum de Ascensionis gloria
 profecerunt, ut quicquid illis prius intule-
 rat metum, verteretur in gaudium, pro-
 pterea quod eorum mentes solo futurae cum
 Christo Jesu felicitatis desiderio tenebantur.
 Ita profecto est. Quae Apostolos tum coepit,
 quæ-

Matth.
17.

S. Leo
Serm. 1.
de Ascens.

quaeque adhuc in nobis ipsis, ac universa in Ecclesia viget, ac vigebit in posterum, aeternitatis cupiditas, accepta potissimum referri debet divinae huic celebritati, quae fuit ex omnibus una maxime triumphalis.

Neque vero quis putet hanc desiderii vim, qua divinitus inflammamur, inanem esse: ejusmodi enim haec cupiditas est, quae Spem habet comitem, & eam quidem certissimam maximeque constantem. Quemadmodum ex quo primus Adam ab altissimo dignitatis gradu nos secum una praecipitavit, terram illam beatam, unde ipse exulare coactus fuerat, cupere non audebamus, nedum sperare: ita quum humanitatem hanc nostram immortalitate donatam secum ad caelum rapuit secundus Adam, non solum alte spectare jussit cupiditates nostras, verum etiam fidenti erectoque nos animo esse voluit, & in expectationem venire minime incertam sempiternae felicitatis. Spem porro hanc maximam qui cognoscere plane velit, sic cum Apostolis, ac nobiscum accipiat Christum Dominum colloquentem. Expedi, inquit ipse, expedit vobis, ut ego vadam, perinde ac si dicat, me modo nobili pro-

provincia functum, debellatisque hostibus
iusto, ac pleno triumpho caelum ingredien-
tem videbitis, sed civitatis illius valvas tot
jam saeculis interclusas vobis omnibus ape-
rientem. Decora haec victoriae pulcherrima,
immortalitatis hic splendor meae non tam
debitus mihi est, quam vobis utilis, ac ne-
cessarius, quippe qui cum mortis fructus
& laborum meorum, tum communis auspi-
cium felicitatis est, cui par nihil dici, nihil
exprimi mortalium potest significatione ver-
botum: Omnis mihi in caelo est, & in ter-
ra potestas tradita, ideo vires hic vobis ad
pugnam suppetam, sedem disponam illic &
locum certum in regno meo, hic strenue pro
me certantibus adero, parabo illic palmas
perpetuo duraturas, quemque hic ingeni-
tum, infinitum, perpetuum, unicum prae-
dicabitis, probabo me vobis illic misericor-
dem, largum, beneficum, liberalem. Ti-
morem ergo, si quem habetis, deponite,
bono estote animo: vado, & venio ad vos.
Ejusmodi si Redemptoris oratio spem no-
strum omnium immortalitatis plenam non
esse jubet, profecto ignoro, undenam illu-
striora fiduciae argumenta repetere quisquam
possit. Quo enim spectant amantissima haec
ejus

Matth.
28.

Luc. 22.

Ibid.

Sap. 3.

- Joan.* 20. ejus verba, sese ad Patrem suum, & Patrem nostrum ascendere? quum ait, multas
- Joan.* 14. in domo Patris sui stationes esse, quid aliud nobis, nisi spem sui possidendi certissimam significavit? Haec igitur illa dies, quae verae ac solidae tranquillitatis est nuncia, salutaris haec illa lux, quae summa nobis omnia pollicetur, ac desert. Age vero in hanc fidem apertissime, siquis umquam, nos erigit Regius Vates praeclare inquires, deduxisti me, Domine, quia factus es spes mea. Neque planè id sine causa. Secum enim, ut egregie Chrysostomus in hunc locum, secum, inquam, per omnem vitae suae statum deduxit Reparator noster, ac Parens Deus. Mortalis hujus in caecitate corporis majestatem abscondit suam? vita tum quoque nostra in Deo est abscondita cum Christo Jesu: raptus ad mortem fuit, oblatuque pro nobis victima? commori secum nos etiam voluit & interitum suum nobiscum esse communem: vulneribus in gloriam commutatis ad vitam rediit immortalem? nos quoque omnes ad felicissimam vitae diuturnitatem a mortuis excitavit: triumphali nunc demum lumine circumfusus Civitatem illam perfecti decoris ingressus est? Clementiam in-
- pri-

primis suam magnificentissimè declaravit, & nos secum jussit in caelestibus confedere. *Superfundentibus itaque se in vultus gaudiis illud iterum usurpemus, deduxit nos secum Dominus, & semper egregie omnino feliciterque, sed hoc potissimum die, quem unum ducimus nostris omnibus quamlibet inusitatis, atque innumerabilibus gratulationibus jure anteponendum. Caetera enim beneficia divinitus in nos collata, summa illa quidem & immortalia, omnium tamen quidam veluti cumulus hodiernum fuit, quo nihil ad gloriam magnificentius, nihil olim praeclarius cujusquam mens aut cogitatio capere potuit. Ascendit in caelum ante hunc diem Elias, sed ejus splendor habuit admirationis plurimum, jucunditatis fortasse parum. Sibi enim felix, sibi uni beatus exitit, neque nobis, quo ipse ascenderat, iter eodem valuit aperire. Triumphantis quidem personam induit, conditionem tamen servuli non amisit. Eam iccirco spectatoribus laudem optare licuit, non sperare. At vero quum Christi Ascensio memoratur, ejus divina lux undequaque in majestate amabilis aequè multum nobis admirationis affert, atque jucunditatis. Etenim personam ipse quum*

Ephes. 2.

4. Reg. 2.

Rom. 8.

quum triumphantis induit, Regis quoque potentiam adeptus est, & regio in dominatu nec parens esse desuit, nec primogenitus in multis fratribus. Pulchrum est imperio parere Principis, cujus & summa potestas sit, & gratificandi voluntas optima: longe pulchrius Fratrem in regno cernere, qui suis prodesse omnibus velit, obesse nemini: pulcherrimum denique profecto est, a quo magna sperare unice debeas, Parentem in Caelo habere, cujus nomen quid voluptatis quid suavitatis habeat, ac bonae spei dici non potest. Qui infinita Angelorum concinentium

*S. Max.
Serm. de
Pont. 2.*

multitudine Rex Regum maximus salutatur, cujus in manu felicitas nostra est, & securitas, qui nunc proprio in regno residens Victor dona largitur, & suorum virtutes remuneratur, is non Princeps modo, sed unus ex nobis est, & Parens omnium amantissimus,

Prov. 8.

cui vel antequam e Caelo delaberetur, deliciae fuerant esse cum filiis hominum: num quis jam audeat dubitare, quin suae nos velit felicitatis esse participes, perfruendasque nobis divinas tradere voluptates? Ejusmodi vero hinc facessere dubitationem Jubet Augustinus inquiring: factus est Christus spes nostra: in illo vides laborem & mercedem

no-

nostram ; in Passione laborem , in Ascensione mercedem . O summe igitur , o maxime rerum parens , ac moderator tu dignus unice , tu dignus es , cui spirans omnis intelligentisque natura , ac genus in primis nostrum & agere numquam desinat gratias , & habere . Nemo est enim , qui non fateatur , triumpho hoc tuo salutem contineri suam , & ex unius tuâ immortalitatem pendere omnium . Tuum est , si vera bona , quae sola sunt hoc nomine nuncupanda , & speramus & cupimus , tuum est . Per te & securi vitam , quae tute frueris , expectamus , & beati futurae felicitatis contemplatione jam vivimus . Quare immortali huic beneficio tuo aeternum grati animi monumentum promittimus , & quum te Apostoli ad gloriam ascendentem , quem incessu pedum non poterant , oculis , & spiritu prosequuti sint , eorum exemplo moniti id nos quoque praestamus intelligentes , ingens ad grandia compendium esse audere grandia imitari .

*S. Max.
idid.*

I M P R I M A T U R,

Si videbitur Reverendissimo Patri Magistro Sacri Palatii Apostolici .

F. M. de Rubcis Archiep. Tarsen. Viceger.

I M P R I M A T U R.

Fr. Aloysius Nicolaus Ridolfi Ordinis Prædicatorum,
Sacri Palatii Apostolici Magister,